

Giusep Deragisch-Giossi, Bugnei



Suenter ina maligna malsogna eis el sedurmentaus ruasseivlamein ils 30 da november 1996 el spital a Glion el ravugl da sia famiglia ella vegliadetgna da prest 63 onns.

Il Giusep Deragisch ei naschius ils 17 da schaner 1934 a Bugnei sco fegl da Duri Vigeli Deragisch e Maria Clara , nata Giger. Ensemes cun ses treis fargliuns ha el passentau siu temps d'affonza a Bugnei el ravugl d' in ambient ventireivel e cristian. Suenter las scolas da vischnaunca ei il Giusep serendius egl jester per gudignar il paun da mintgadi e sgidar culs geniturs. Aschia eis el staus in temps fumegl vi Ursula. Turnaus a casa eis el semess en a far il pur entochen l'entschatta dils anno sisonta.

Cun l'entschatta dallas lavurs dalla ORA ha el calau cul puesser e s'engaschus 1961 tier la firma Bell da Kriens sco gidonter da montar turbinas ella centrala a Sedrun. In onn pli tard eis el vegnius eligius sco emploiau stabel tier la ORA.

Igl onn 1968 marida el la giuvna Maria Giossi da Platta. Treis affons, dus buobs ed ina buoba, ein il grond plascher dalla famiglia.

Duront vegn onns fa el il survetsch da maschinist tier la ORA. Metter en funcziun las maschinas, scriver giu dattas, unscher e schubergiar e tener bien uorden, gidar vid reparaturas ed aunc bia auter ha pretendiu lavur conscienuisa fatga cun gronda responsabladad. Da tut temps ha el mess a disposiziun sias forzas cun gronda premura ed attaschadedad. La lavur en profund dil Tgom ha murdiu vid las forzas dil Giusep. Ils davos onns eis el lu s'engaschaus per lavurs ora el liber, el luavratori e contuorn entochen ch'el ha buca pudiu pli ed ei vegnius pensiunaus igl onn 1993 pervia d'ina maliziosa malsogna.

Ussa entupavan ins savens il Giusep sin sias spassegiadas viers Mustér. Bugen deva el ina paterlada da quei e da tschei. Il Giusep eis staus in um sempel, da siu fatg, buca in da grondas caneras e patarlas, in bien carstgaun cun ina ferma cardientscha e profunda pietusadad.

Avoncaduras ha la malsogna raffau la veta dil Giusep. Il Segner ha spluntau e clamau el a casa. In grond conduct da bara ha accumpaignau igl attaschau vischin ils 3 da december sin santeri da s.Vigeli. El ruaussi en pasch.